

KERATAN AKHBAR

JUDUL : PENDEKATAN PROAKTIF PERPUSTAKAAN HIDUPKAN
SEMULA BUDAYA MEMBACA

TARIKH : 6 OKTOBER 2025

SITASI :

M/S :

Pendekatan proaktif perpustakaan hidupkan semula budaya membaca. (6 Oktober 2025).
Berita Harian

Pendekatan proaktif perpustakaan hidupkan semula budaya membaca



Oleh **Datuk Aaron Ago Dagang** - Oktober 6, 2025 @ 12:51pm
bhrencana@bh.com.my



Foto hiasan. - Bernama

Kementerian Perpaduan Negara melalui Perpustakaan Negara Malaysia (PNM) terus membuktikan komitmen dalam memperkukuh budaya ilmu di negara ini.

Sepanjang 2024 sahaja, sebanyak 56,473 program galakan membaca dilaksanakan di seluruh negara. Program ini bukan sekadar angka statistik, sebaliknya menjadi langkah strategik ke arah mencapai misi Negara Membaca menjelang 2030, iaitu membina masyarakat berilmu melalui pembacaan sebagai asas perubahan zaman.

Sering timbul persoalan mengenai kerelevanan perpustakaan pada era digital kini. Ada beranggapan perpustakaan semakin sunyi kerana buku boleh diakses secara dalam talian, malah ada yang menyifatkannya sebagai 'membosankan'.

Namun, fakta membuktikan sebaliknya. Data menunjukkan pada 2024, seramai 8,281,541 pengguna menggunakan perkhidmatan PNM. Angka ini adalah bukti nyata bahawa perpustakaan bukan sahaja masih relevan, malah terus menjadi pusat rujukan, pembelajaran dan interaksi sosial yang penting dalam membina masyarakat berpengetahuan.

Kementerian Perpaduan Negara juga mengambil perhatian serius terhadap cabaran, terutama persepsi generasi muda yang kadang-kadang menganggap perpustakaan membosankan.

Pendekatan proaktif sedang dijalankan untuk menghidupkan semula pengalaman di perpustakaan termasuk aktiviti interaktif, teknologi digital dan pengalaman pembelajaran yang menyeronokkan.

Dengan langkah ini, kementerian memastikan perpustakaan kekal relevan, menarik dan sesuai dengan gaya hidup generasi muda, sambil memupuk minat membaca dan budaya ilmu sebagai asas pembinaan masyarakat berpengetahuan.

Ke arah pendigitalan perpustakaan

Kini, kementerian melalui PNM juga sedang bergerak ke arah pendigitalan perpustakaan seiring perkembangan teknologi terkini, termasuklah kecerdasan buatan (AI), realiti maya serta metaverse.

Transformasi digital ini bukan bermakna perpustakaan fizikal akan terhapus, sebaliknya menjadi pelengkap kepada akses maklumat yang lebih luas, fleksibel dan sesuai dengan gaya hidup generasi baharu.

Sejarah dunia sendiri membuktikan perpustakaan adalah institusi mampu bertahan merentasi perubahan zaman. Perpustakaan Iskandariah di Mesir pernah menjadi pusat tamadun ilmu dunia, manakala Perpustakaan Bodleian di Oxford dan Perpustakaan Kongres di Amerika Syarikat (AS) pula kekal hingga kini sebagai lambang ketamadunan, penyelidikan serta pencapaian ilmu manusia.

Maka, perpustakaan di negara ini juga mampu terus bertahan jika mendapat kerjasama erat daripada semua pihak, kerajaan, sektor swasta, pertubuhan bukan kerajaan (NGO), komuniti setempat dan individu.

Peranan perpustakaan hanya akan terus hidup sekiranya masyarakat mendukungnya sebagai ruang pembelajaran sepanjang hayat. Dalam dunia semakin kompleks, membaca bukan sekadar hobi tetapi keperluan untuk melahirkan warganegara berpengetahuan, kritis dan bersatu padu.

Dengan sokongan padu semua lapisan masyarakat, Misi Negara Membaca 2030 bukan sahaja mampu direalisasikan, malah akan mengangkat Malaysia sebagai sebuah negara maju berpaksikan ilmu dan budaya intelektual.

Seiring matlamat itu, Kementerian Perpaduan Negara melalui PNM melancarkan Kempen Malaysia Membaca sepanjang Oktober dengan pelbagai program dan aktiviti menarik dijalankan di perpustakaan seluruh negara.

Usaha ini bukan sekadar memupuk minat membaca, tetapi juga menghidupkan perpustakaan sebagai pusat ilmu, ruang interaksi komuniti dan simbol perpaduan rakyat.

Kempen ini menjadi kesinambungan misi besar negara untuk melahirkan masyarakat berpengetahuan, kritis dan progresif sekali gus menjadikan pembacaan sebagai budaya hidup yang menyatukan kita menuju Malaysia sebagai Negara Membaca 2030.